

四庫全書

子部

欽定四庫全書

子部  
玉海卷四十三

詳校官給事中<sub>臣</sub>查善長

主事<sub>臣</sub>祁韻士覆勘

總校官進士<sub>臣</sub>朱 鈐

校對官編修<sub>臣</sub>馬啟泰

謄錄監生<sub>臣</sub>南光普

欽定四庫全書

玉海卷四十二

宋 王應麟 撰

藝文

經解 總六經

記之經解指詩書禮樂易春秋之教未始正六經之名莊子天運篇始述老子之言曰六經先王之陳迹實昉乎此太史公滑稽傳以禮樂詩書易春秋為六

藝而班史因之又以五學配五常而論語孝經並記於六藝畧中自時厥後或曰五經或曰六經或曰七經至唐貞觀中谷那律淹貫羣書褚遂良稱為九經庫九經之名又昉乎此其後明經取士以禮記春秋左傳為大經詩周禮儀禮為中經易尚書春秋公穀為小經所謂九經也國朝方以三傳合為一又舍儀禮而以易詩書周禮禮記春秋為六經又以孟子升經論語孝經為三小經今所謂九經也

孔子經解

記經解第二十六孔子曰入其國其教可知也其為人  
也溫柔敦厚詩教也疏通知遠書教也廣博易良樂教  
也潔靜精微易教也恭儉莊敬禮教也屬辭比事春秋  
教也正義按鄭目錄云記六藝政教之得失於別錄屬  
通論經解一篇總是孔子之言記者錄之皇氏曰解者  
分析之名此篇分析六經體教不同故名經解六經其  
教雖異總以禮為本故記者錄入於禮 荀子善為詩

者不說善為易者不占善為禮者不相 文中子門人  
有問姚義孔庭之法曰詩曰禮不及四經何也曰四者  
非具體不能及故聖人後之 經典序錄經解以詩為  
首七畧藝文志用易居前阮孝緒七錄亦同此次王儉  
七志孝經為初

孔子十二經

莊子天道篇孔子西藏書於周室縉十二經以說  
老聃釋文六經六緯一說云易上下經并十翼一

云春秋十二公經也 南史周續之受業范甯通  
五經五緯號曰十經 蜀志秦宓曰文翁遣相如  
東受七經還教吏民 隋志樊文深七經義綱二  
十九卷七經論三卷 宋官志國子助教十人周  
易尚書毛詩禮記周官儀禮春秋左氏公羊穀梁  
各為一經論語孝經為一經合十經助教分掌

孔子二經 二學

中庸注孔子曰吾志在春秋行在孝經二經固足以明

之孔子祖述堯舜之道而制春秋斷以文王武王之法  
度 公羊何休序孔子有云吾志在春秋行在孝經此  
二學者聖人之極致治世之要務也 疏案孝經鉤命決  
云孔子在庶德無所施功無所就志在春秋行在孝經  
是也 二學者春秋孝經也

漢古文舊書 古今學

列傳河間獻王德景二年立修學好古從民得善書必  
為好寫與之留其真所得書皆古文先秦舊書周官尚



書禮禮記孟子老子之屬其學舉六藝立毛氏詩左氏  
春秋博士 司馬遷十歲誦古文 劉向上方精於詩  
書觀古文詔向領校中五經祕書 劉歆欲建立左氏  
毛詩逸禮古文尚書列學官移書曰魯恭王得古文於  
壞壁之中逸禮有三十九書十六篇天漢之後孔安國  
獻之及春秋左氏丘明所修皆古文舊書多者二十餘  
通臧於祕府伏而未發孝成閔學殘文缺乃陳發祕臧  
校理舊文得此三事考學官所傳經或脫簡傳或間編

抑此三學以尚書為備謂左氏不傳春秋古文舊書皆有證驗外內相應禮失求之於野古文不猶愈於野乎

藝文志易劉向以中古文易經校唯費氏經與古文

同書古文經四十六卷為五十七篇劉向以中古文校

三家經文詩毛公自謂子夏所傳禮古經五十六卷出

於魯淹中周官經六篇

亡冬官以考  
工記充之

春秋古經十二篇

論語古二十一篇出孔壁兩子張孝經古孔氏一篇二

十二章孔壁古文

志又云史籀篇與孔  
子壁中古文異體

史記太史公

曰秦撥去古文

始皇二十四年始下焚書之令距漢興纔七年耳

書序孔子

舊宅壁中得先人所藏古文虞夏商周之書及傳論語

孝經皆科斗文字以所聞伏生之書考論文義定其可

知者為隸古定更以竹簡寫之

用隸書寫古文

桓譚新論易

連山八萬言歸藏四千三百言古文尚書舊有四十五

卷為十八篇古秋禮記有五十六卷古論語二十一卷

古孝經一卷二十章千八百七十二字今異者四百餘

字蓋嘉論之林藪文義之淵海也 後傳桓譚好古學

數從劉歆揚雄辨析疑異 杜林得漆書古文尚書一

卷 鄭玄初中興之後范升陳元李育賈逵之徒爭論

古今學後馬融答北地太守劉瓌及玄答何休義據通

深古學遂明 鄭興好古學尤明左氏周官自杜林桓

譚衛宏之屬莫不斟酌宏好古學 賈逵雖為古學兼通五

家穀梁之說 崔駰通古今訓詁 劉陶推三家及古

文是正名中文尚書 盧植與鄭玄俱事馬融能通古

今學好研精而不守章句上書曰臣從通儒馬融受古

學古文科斗近於為實而厭抑流俗降在小學 衛宏

好古學

隋志議郎衛敬仲古文官書一卷

孔叢子孔臧曰侍中安國

受詔綴集古義乞為太常典臣家業紀綱古訓孔大夫

謂季彥曰今海內皆為章句內學君獨治古義治古義

則非內學非之則危身之道先聖古文臨淮傳義

安國

不

在科策之例世人固莫識也

長彥隨時為今學

說文序孔子

書六經左丘明述春秋傳皆以古文許慎子冲曰臣父

從賈逵受古學 家語後序孔安國考論古今文字撰

衆師之義為古文論語訓十一篇孝經傳二篇尚書傳五十八篇皆所得壁中科斗本也又集錄孔子家語為四十四篇 公羊序治古學貴文章者謂之俗儒疏左氏先著竹帛故漢時謂之古學公羊漢世乃興故謂之今學治古學者即鄭衆賈逵之徒 蜀志尹默從司馬德操宋仲子等受古學 隋志光武以圖讖興俗儒趨時益為其學言五經者皆憑讖為說唯孔安國毛公王璜賈逵之徒獨非之故因漢魯恭王河間獻王所得古

文參而考之以成其義謂之古學世儒非毀竟不得行  
魏代王肅推引古學以難其義王弼杜預從而明之自  
是古學稍立漢世經先出者不如後出盛傳於後世  
費氏易 古文尚書 毛詩 小戴禮 左氏春  
秋

漢石渠議奏

宣紀甘露三年三月詔諸儒講論五經同異

易則施雠  
梁丘臨書

則周堪張山拊林尊歐陽地餘假倉詩則韋玄成張生  
薛廣德禮則戴聖韋玄成閻人通漢穀梁則蕭望之劉

向尹更始太子太傅蕭望之等平奏其議上親稱制臨決焉

迺立梁丘易大小夏侯尚書穀梁春秋博士

列傳

又儒

林傳劉向本名更生初立穀梁春秋名更生受穀梁講論

五經於石渠 薛廣德以魯詩為博士論石渠遷諫大

夫 韋玄成受詔與太子太傅蕭望之及五經諸儒雜

論同異於石渠閣條奏其對 施讎詔拜為博士甘露

中與五經諸儒雜論異同於石渠注師古曰三輔故事

云石渠閣在未央殿北以藏祕書也 梁丘賀子臨為



黃門郎甘露中奉使問諸儒於石渠臨學精熟專行京

房法 歐陽地餘為博士論石渠 林尊為博士論石

渠周堪為譯官令論石渠經為最高 張山拊為博士

論石渠 假倉以謁者論石渠 戴聖以博士論石渠

隋志有石渠禮論四卷戴聖撰 張生為博士論石渠 聞人通漢以

太子舍人論石渠 藝文志書議奏四十二篇禮議奏

三十八篇春秋議奏三十九篇論語議奏十八篇五經

雜議十八篇 凡百五十五篇 後陳元傳孝宣為石渠論而穀

梁氏興 穀梁序漢興以來瓌望碩儒各信所習是非  
紛錯準裁靡定故有父子異同之論石渠分爭之說  
禮運正義議郎尹更始待詔劉更生等議石渠以為吉  
凶不並瑞災不兼麟為周亡之異不得為瑞

漢五經雜議 通義 要義 演經雜論 通

論 五經論

志孝經家有五經雜議十八篇石渠論 唐志經解劉

向五經雜義七卷又通義九卷

隋志八卷  
梁九卷

要義五卷

隋志

梁十七卷雷氏撰 舊唐志五經雜義  
七卷又通義九卷要義五卷劉向撰

後傳曹裒作

演經雜論百二十篇通義十二篇

沛獻王輔

光武子

好

經書善說京氏易孝經論語傳及圖讖作五經論時號

曰沛王通論

明紀注通典冬至夏至寢兵

廣韻注引通

義 百官志注引五經通義二王之後不考功 世說

注引通義要義

隋禮儀志引要義曰笏所以記事通

義曰弁高五寸前後玉飾

文選注引五經要義太一

一名終南山又曰籍田千畝以先百姓致孝敬

文選雪賦注引

五經  
通訓

通典引通義曰號所以表功德 北史劉芳引

通義太社王社要義社必植以木 隋志孫暢之五經

雜義六卷梁又有五經義畧一卷 劉向辨章舊

聞則有五經通義沛獻說易圖讖則有沛王通論

建初會羣儒考同異則有白虎通義易通論作於

注丹五經通難著於程曾 曾著書百餘篇 通義十二篇作於

曹褒 褒傳慶氏禮又有演經雜論百二十篇 鄭玄有六藝論許慎有異義

魏王肅有聖證論晉束皙亦有五經通論譙周有然

否論五卷戴逵大義三卷梁鮑泉六經通數十卷邯鄲  
綽五經析疑二十八卷元延明宗畧二十三卷

漢六藝畧

見書目

五學

志六藝一百三家三千一百二十三篇

入三家一百五十九出篇重十

一篇

六藝之文樂以和神仁之表詩以正言義之用禮以

明體故無訓書以廣聽知之術春秋以斷事信之符五  
者五常之道而易為之原易與天地相終始至於五學  
世有變改猶五行之更用事 叙傳世宗憲章六學

儒林叙傳漢存其業六學析分 史記太史公論六家

曰六藝經傳以千萬數累世不能通其學當年不能究

其禮協六經異傳董仲舒通五經 王吉通五經為騶

氏春秋以詩論語教授好梁丘臨一作賀說易令子駿受

焉 夏侯始昌通五經以齊詩尚書教授

易書 王璜費氏古文 詩禮 后蒼 詩書 徐教古文書毛詩夏侯始昌齊詩尚書

書春秋 胡常古文穀梁左氏 禮春秋 孟卿后氏禮疏氏 詩春

秋 申公江公榮 易詩 韓嬰

廣魯詩穀梁

漢六藝九種

志序六藝為九種 易十三家二百九十四篇 書九  
家四百十二篇 詩六家四百十六卷 禮十三家五  
百五十五篇 樂六家百六十五篇 春秋二十三家  
九百四十八篇 論語十二家二百二十九篇 孝經  
十一家五十九篇 小學十家自史籀至杜林蒼頡故  
三十五篇

漢五經章句

藝文志易章句施孟梁丘各二篇丁寬有小章句

費直長於

小學

書章句歐陽三十一卷大小夏侯各二十九卷

張無

故善修章句守小夏侯說又秦恭增師法至百萬言

春秋公羊三十八篇穀梁三

十三篇

儒林傳尹更始左氏章句

劉歆章句備焉

夏侯勝

傳曰建所謂章句小儒破碎大道

後紀建初四年十

一月壬戌詔中元元年詔書五經章句煩多議欲減省

至永平元年長水校尉儵奏言先帝大業當以時施行

欲使諸儒共定經義於是會白虎觀議同異八年十二



月戊申詔曰五經剖判去聖彌遠章句遺辭乖疑難正  
恐先師微言將絕其令羣儒選高才生受學穀梁左氏  
春秋古文尚書毛詩以扶微學廣異義 易惟樊英習

京氏著章句

唐志孟喜京房費直  
馬融荀爽有章句

書歐陽有牟長章句

牟卿章句四十五萬餘言張奐減為九萬言桓榮受朱

普學章句四十萬言入授顯宗減為二十三萬言子郁

刪定成十二萬言有桓君大小太常章句盧植作尚書

章句詩則伏黯改定齊詩章句子恭減省浮辭定為二

十萬言杜撫定韓詩章句張康作韓詩章句薛漢世習  
韓詩父子以章句著名禮則橋仁從戴德學著禮記章  
句四十九篇曹充習慶氏學作章句辨難曹褒新禮章  
句景鸞月令章句蔡邕月令章句春秋則鄭興撰左氏

條例章句樊儵鍾興刪定公羊嚴氏章句

又使宗室從興受章句

楊終改定春秋章句十五萬言

唐志有賈逵左氏長經章句二十卷鄭衆牒例

章句九卷

列傳桓譚帝方信讖譚言宜屏羣小之曲說述

五經之正義譚徧習五經皆詁訓大義不為章句

隋志漢時

又詔東平王蒼正五經章句皆命從  
識俗儒趨時言五經者皆憑識為說

桓郁遷侍中顯

宗制五家要說章句令郁校定於宣明殿 鄭玄傳論

東京學者經數家家數說章句多者百餘萬言學徒勞

而少功後生疑而莫正 傅毅永平中於平陵習章句

作迪志詩

文苑

孔僖子長彥好章句

儒林

王充好博覽

不守章句 盧植不守章句 荀淑博學不好章句多

為俗儒所非 梁鴻韓融不為章句 徐防和帝永元

十四年拜司空以五經久遠聖意難明宜為章句以悟

後學上疏曰詩書禮樂定自孔子發明章句始於子夏  
其後諸家分析各有異說今不依章句妄生穿鑿臣以  
為博士及甲乙策試宜從其家章句開五十難試之詔  
從防言 順紀陽嘉元年十一月令孝廉諸生通章句  
乃得應選 儒林傳順帝更修黌宇游學雖增盛而章  
句漸疎浮華相尚 劉表傳博求儒術綦母闓宋忠等  
撰立三經章句謂之後定 詩正義自古而有篇章之  
名與詩禮俱興也句則古者謂之為言秦漢以來衆儒

各為訓詁乃有句稱句必聯字而言句者局也聯字分  
疆所以局言章者明也總義包體所以明情 六藝論  
未有若今傳訓章句明為傳訓以來始辨章句 文心  
雕龍若秦延君之注堯典十餘萬字朱普之解尚書三  
十萬言所以通人惡煩羞學章句若毛公訓詩安國傳  
書鄭君釋禮王弼解易要約明暢可為式矣

故

謂通指義 書有夏侯解故詩有魯故后  
氏故韓故毛詩故訓傳小學有杜林蒼頡故

微

謂釋  
微指

春秋有左氏微鐸氏  
微張氏微虞卿微傳

通

注君通白虎通風俗  
通史通韓混春秋通

典籍之存詁訓之傳皆漢儒之力 詩有魯故韓故齊

后氏故齊孫氏故毛詩故訓傳書有大小夏侯解故前人惟故之尚如此今人乃新之急邪贅以釋老鑿以申韓塗人之耳目而變易其心思 經猶的也一人射之

不若衆人射之其中者多也 傳師所說謂之傳丘明

子夏於春秋禮經作傳是也 古者以一句為一言

一言

蔽之曰思無邪 揚之水 秦漢以來衆儒各為訓詁乃

卒章之四言

大叔九言

有句稱

漢儒林傳業

前儒林傳贊自武帝立五經博士開弟子員設科射策  
勸以官祿訖於元始百有餘年傳業者寢盛支葉蕃滋  
一經說至百餘萬言大師衆至千餘人蓋祿利之路然

也

傳言家世傳業者易

士孫張

書

陳翁生平當

詩

滿昌伏理

禮

橋仁

徐良

春秋

王中

漢興言易自淄川田生言書自濟南伏生言

詩於魯則申培公於齊則轅固生燕則韓太傅言禮則  
魯高堂生言春秋於齊則胡毋生於趙則董仲舒 易

本田何有施孟梁丘之學施家有張彭之學孟喜有翟  
孟白之學梁丘有士孫鄧衡之學有京氏之學有高氏  
學高費皆未立學官 書歐陽大小夏侯氏學皆出於  
倪寬世有歐陽氏學歐陽有平陳之學有大小夏侯之  
學大夏侯有孔許之學小夏侯有鄭張秦假李氏之學  
孔氏古文未立學官百兩篇出張霸 魯詩有韋氏學  
有張唐褚氏之學江公世為魯詩宗張家有許氏學齊  
詩有翼匡師伏之學韓詩有王食長孫之學言毛詩本



徐敖 禮為頌者由徐氏禮有大戴小戴慶氏之學大戴有徐氏小戴有橋楊氏之學 公羊春秋有顏嚴之

學顏家有冷任之學有筦冥之學穀梁春秋有尹胡申

章房氏之學言左氏本賈護劉歆 志春秋分為五

左氏

公羊穀梁 詩分為四 毛齊 易有數家之傳

鄒夾氏

魯韓

### 漢師法

儒林傳孟喜受易博士缺衆人薦喜上聞喜改師法遂

不用 秦恭 小夏 增師法至百萬言 唐長賓褚少孫

侯書

事王式問經數篇式曰聞之於師具是矣自潤色之不  
肯復授唐生褚生試誦說有法疑者丘蓋不言 胡毋  
生治公羊弟子唯嬴公守學不失師法 梁丘臨學精  
熟專行京房法 列傳匡衡對詩諸大義說有師道可  
觀覽 張禹對易論語大義經學精習有師法 魏相  
明易經有師法

漢五經家法 通經名家

宋百官志漢武建元五年初置五經博士宣成之世五

經家法稍增經置博士一人至東京凡十四人 詩正義漢承滅學之後典籍出於人間各專門命氏以顯其家之學故為傳訓者皆云氏不言名 後儒林傳序光武立五經博士各以家法教授凡十四博士肅宗詔高才生受古文尚書毛詩穀梁左氏春秋雖不立學官然皆擢高第為講郎以網羅遺逸博存衆家東京學者猥衆今但錄其能通經名家者以為儒林篇其自有列傳者則不兼書若師資所承標名為證乃著之

易

施氏

劉昆  
子軼

孟氏

汪丹  
任安

梁丘

楊政  
張興子魴

京氏

戴憑

魏滿  
孫期

書

歐陽

歛曹曾陳  
弁牟長宋登

大夏侯

張馴  
字子雋

古文

尹敏  
周防孔僖

楊倫

詩

魯

高詡包  
咸魏應

齊

伏恭任  
末景鸞

韓

薛漢杜  
楊仁趙

撫名伯  
堯張康

春毛  
謝曼

卿衛  
宏

禮

慶氏

董鈞

春秋

公羊嚴氏

丁恭周澤  
鍾興甄  
字子善樓望程曾

顏氏

張玄

公羊

李育

何左氏 服虔穎  
容謝該

通五經 許慎  
蔡玄

如費氏易有陳元鄭衆馬融鄭玄荀爽 夏歐尚書

有牟融王良桓榮 古文尚書有杜林賈逵 毛詩

有鄭衆賈逵馬融鄭玄 慶氏禮有曹充褒 三禮

有馬鄭 左氏春秋有鄭興陳元自有列傳而標名

儒林之篇

後紀質帝本初元年詔四姓小侯先能通經者各命隨

家法注儒生為詩者謂之詩家為禮者謂之禮家 列

傳徐防言大學試博士弟子皆以意說不修家法論議

紛錯互相是非注諸經為業各自名家 左雄言孝廉

諸生試家法 楊統父春卿善圖讖統作家法章句及

內讖二卷解說 鄭玄傳論漢興諸儒頗修藝文東京

學者亦各名家經有數家家有數說章句多者或百餘

萬言學徒勞而少功後生疑而莫正鄭玄括囊大典網

羅衆家刪裁判改學者畧知所歸王父豫章君范傳授

生徒專以鄭氏家法

玄習春秋顏氏兼通數家法

樊準曰孝明多名儒充禮官博士議郎一人開門徒衆百數 賈逵曰先帝博觀異家各有所採易有施孟復立梁丘尚書歐陽復有大小夏侯

漢儒林弟子著錄 經生編牒

後儒林傳論自光武中年專事經學其風世篤經生

謂博

士所處不遠萬里之路精廬暫建贏糧動有千百其耆名高義開門授徒者編牒不下萬人皆專相傳祖莫或

訛雜至有分爭王庭植朋私里繁其章條穿求崖穴以  
合一家之說 張興習梁丘易弟子自遠至者著錄且  
萬人 牟長習歐陽尚書著錄前後萬人 魏應受魯

詩弟子著錄數千人 丁恭習嚴春秋著錄數千人

樓望習嚴春秋著錄九千餘人 張玄習顏氏著錄千

餘人 蔡玄通五經著錄萬六千人

注著於  
籍錄

漢羣臣說經

戴憑傳習京氏易名試博士拜郎中時詔公卿大會羣



臣皆就席憑獨立光武問其意對曰博士說經皆不如  
臣而坐居臣上帝即召上殿令與諸儒難說多所解釋  
帝善之拜虎賁中郎將以侍中兼領正旦朝賀百僚畢  
會帝令羣臣能說經者更相難詰義有不通輒奪其席  
以益通者憑重坐五十餘席京師語曰解經不窮戴侍  
中 藝文類聚殷氏世傳曰殷亮建武中拜博士諸儒  
講論勝者賜席亮重至八九詳見  
帝學 魯丕傳元和中引  
見難問經傳永元十一年和帝因朝會召見諸儒丕與

賈逵黃香等相難數事帝善丕說上疏曰說經者傳先  
師之言非從己出難者必明其據說者務立其義法異  
者各令自說師法博觀其義覽詩人之旨意察雅頌之  
終始明舜禹臯陶之相戒顯周公箕子之所陳

漢白虎議奏 通義 通德論

章紀建初四年十一月壬戌詔曰中元元年詔書五經  
章句煩多議欲減省至永平元年長水校尉儵樊儵奏言  
先帝大業當以時施行欲使諸儒共正經義令學者得

以自助於戲其勉之哉於是太常將大夫博士議郎郎官及諸生諸儒會白虎觀講議五經異同使五官中郎將魏應承制問難侍中淳于恭奏上帝親稱制臨決如孝宣甘露石渠故事作白虎議奏注今白虎通 儒林

傳建初中大會諸儒於白虎觀考詳同異連月乃罷肅

宗親臨稱制如石渠故事顧命史臣著為通義

即白虎通議是

也魏應專掌難問

餘同章紀

李育建初四年詔與諸儒論

五經於白虎觀育以公羊義難賈逵徃反皆有理證最

為通儒 列傳魯恭習魯詩肅宗集諸儒於白虎觀恭  
特以明經得召與其議 丁鴻建初四年肅宗詔與廣  
平王羨及諸儒樓望成封桓郁賈逵等論定五經同異  
於北宮白虎觀使五官中郎將魏應主承制問難侍中  
淳于恭奏上帝親稱制臨決鴻以高才論難最明諸儒  
稱之帝數嘆焉注東觀記與太常樓望少府成封屯騎  
校尉桓郁衛士令賈逵等集議白虎門名於門立觀因  
以名焉

傳贊云高  
論白虎

班固遷玄武司馬天子會諸儒講

論五經作白虎通德論令固撰集其事 楊終又言宣

帝博召羣儒定論五經於石渠方今天下少事學者得成其業而章句之徒破壞大體宜如石渠故事永為後世則於是詔諸儒於白虎觀論考同異焉會終坐事係獄博士趙博校書郎班固賈逵等以終深曉春秋學多異聞表請之終又上書自訟即日賞出乃得與白虎觀

陳敬王羨博涉經書有威嚴與諸儒講論於白虎觀  
蔡邕封事曰孝宣會諸儒於石渠章帝集學士於白

虎通經釋義其事優大 通鑑白虎觀議五經名儒丁

鴻樓望成封桓郁班固賈逵及廣平王羨皆與焉 隋

志白虎通六卷 唐志班固等白虎通義六卷 崇文

目白虎通德論十卷 中興書目白虎通十卷凡

四十篇今本自爵號至嫁娶凡四十三篇 蔡玄

傳順帝詔拜議郎講論五經異同甚合帝意 玄

傳

漢諸經通義

又見上

太常試經

孟子題辭漢興孝文廣遊學之路孟子置博士訖今諸

經通義得引孟子以明事謂之博文

東萊曰謂課試者也

詩

小弁

引舜年五十而慕

縣引禮記

王制引貢助徹圭

太王不以養人者害人

禮記

田坊記引舜年

五十不失孺子之心

周禮

大宰八統引爵德齒小司徒引仁政自經界始載師士田引圭田之說及

五畝之宅植桑屨人引市屨而不征法而不屨司

開引關譏而不征函人矢人助有公田野九夫稅一

國中什一之言又引於考工記匠人

以孟子論之周制邦國用殷助法

列傳鄭衆建武

中皇太子及山陽王聘衆欲為通義 伏恭明齊詩建

武十三年太常試經第一拜博士

顏氏博士缺張玄試策第一

周

防儒世祖狩汝南召掾史試經防能誦讀拜守丞高

彪文苑舉孝廉試經第一除郎中徐防永元十四年言

太學試博士弟子皆以意說不修家法臣以為甲乙策

試宜從其家章句五經各取上第六人論語不宜射策

官志司隸有孝經師主監試經諸經通義者

漢五經課試之學也維漢以文立治以經選士鴻

生傳業支蕃葉滋闡繹道真探索聖緼決科射策

則有通義之目以孟子明事則有博文之名趙岐題



辭猶述大槩謹稽合史傳而為之說曰聖人作經載道  
學者因經明道學博而不詳說無以發羣獻之眇指說  
詳而不反約無以折衆言之殺亂故必泝正學之源而  
後能通乎聖人之海粵自木鐸聲寢經與道榛塞孟子  
闢邪距詖羽翼孔道七篇垂訓法嚴義精知性知天易  
之奧也以意逆志詩之綱也言稱堯舜書之要也井田  
爵祿之制可以知禮王霸義利之辨可以知春秋儒者  
稱之曰通五經噫若孟氏斯謂之通矣媿哉漢之尊經

虐儒五十三家莫非賢傳也而孟子首置博士九流百八十九家莫非諸子也而通義得述孟子斯文之統紀以壹多士之趨向以純非徒綴訓故誦佔畢而已若稽前載建元五年春五經始立博士元朔五襮通一藝者試之孝元好儒通一經者復之博士十四昉于建武選受四經俶于建初科有甲乙試有家法或試經于太常或試誦說于博士永元十四年司空徐防建言開五十難解釋多者為上第演文明者為高說所謂博文明事

雖軼不傳然建武中太子諸王欲為通義而聘鄭衆建  
初四年會諸儒白虎觀命史臣著通義曹褒傳慶氏禮  
亦纂通義十二篇觀其名可求其畧矣還觀有漢之盛  
鉅儒石師開門授徒著錄至萬六千人經數家家數說  
章句多者百餘萬言歷禊綿邈湮沒居多嘗即詩禮訓  
注考之小弁述親親之言王制述貢助徹之法爵德齒  
釋於大宰經界釋於小司徒圭田市廛關幾釋於載師  
廛人司關助有公田國中什一及函矢之說又詳列于

考工記珠貫絲組上下洽通蓋傳得其宗無越鄒孟求  
觀聖道必自茲始否則績以華藻汨以緯候茲詭辨  
稽古曼辭燕說郢書吾道莠矣焉得而通諸雖然經學  
至於通而止漢儒之說何其紛紛也五經通義劉向輯  
之五經通論沛獻著之程曾通難注丹易通專已黨同  
轍殊牖異君子已不能無憾況課試之學以明經為祿  
利之塗則通義乃諸儒之筌蹄也其不傳於今有以夫  
吁師異道人異論漢儒之說猶得以考同異析是非也

暨唐貞觀十二年會粹章句為正義百七十卷繇是舉  
天下宗一說而無深造自得之功若明經又變為帖誦  
而口義墨義興焉君子又惜通義之不傳於今也

擬序

### 漢六藝篇錄

張衡傳中興後儒者爭學圖緯衡上疏曰河洛六藝篇  
錄已定後人皮傳無所容纂注衡集上事云河洛五九  
六藝四九謂八十一篇也 尹敏傳世祖令敏校圖讖  
使蠲去崔發所為著錄次比 隋志七經緯三十六篇

並云孔子所作漢代有郝氏袁氏說宋均鄭玄並為讖  
律之注文辭淺俗不類聖人之旨 北史樊深撰七經  
異目三卷

漢六藝論

鄭志

又見後

鄭玄傳事第五元通京氏易公羊春秋三統歷九章算  
術從張恭祖受周官禮記左氏春秋韓詩古文尚書事  
馬融質疑義玄謂所好羣書不得於禮堂寫定傳與其  
人門人相與撰玄答諸弟子問五經依論語作鄭志八

篇凡玄所注周易尚書毛詩儀禮禮記論語孝經尚書

大傳中候乾象歷又著天文七政論魯禮禘祫義六藝

論毛詩譜駁許慎五經異義答臨孝存周禮難凡百餘

萬言

謝承書不言注孝經

經傳洽熟稱為純儒括囊大典網羅衆

家 隋志六藝論一卷鄭玄撰唐志同 聖證論十二卷王

肅撰

唐志十卷

鄭志十一卷

唐志九卷

魏侍中鄭小同撰鄭記

六卷

唐志同

玄弟子撰

魏志孫叔然授學鄭玄之門人

王肅集聖證論以譏短玄叔然駁而釋之

肅規鄭玄數千百條馬昭

劾肅短詔遣博士張融按經問詰  
義聖證論馬昭引穀梁傳以答王肅之難

記正

王基傳散

騎常侍王肅著諸經傳解及論定朝儀改易鄭玄舊說  
而基據持玄義常與抗衡 吳虞翻奏鄭玄所注五經

違義尤甚者百六十七事 晉范甯考先儒經訓而長

於玄傳授生徒專以鄭氏家法 唐元行冲曰康成於

竄伏之中理紛拏之典雖存探究咨謀靡所具鄭志者

百有餘科 劉子玄曰鄭弟子追論師注及應對謂之

鄭志又鄭志目錄記鄭所注五經之外有中候書傳七



政論乾象歷六藝論毛詩譜答臨碩難禮駁許慎異義  
發墨守箴膏肓及答甄子然等書鄭之弟子分授門徒  
各述師言更不問答編錄其語謂之鄭記趙商作鄭先  
生碑銘 公羊疏鄭君先作六藝論訖然後注書 通  
鑑外紀引鄭玄六藝論曰遂皇之後歷六紀九十一代  
至伏羲始作十二言之教方叔機注曰九頭紀一五龍紀  
五攝提紀七十二合洛紀三連通紀六序命紀四凡九  
十一代六藝論曰易者陰陽之象天地所變化政教所

生自人皇初起 詩禮記左氏穀梁公羊疏曲禮玉藻  
正義引六藝論 宋均孝經緯注引鄭六藝論叙孝經  
云玄又為之注

漢四經

賈逵傳建初元年入講古文尚書左傳又條奏左氏大  
義撰歐陽夏侯古文齊魯韓毛詩同異八年

紀十二  
月戊申

乃

詔諸儒選高才生受左氏穀梁春秋古文尚書毛詩由  
是四經遂行於世皆拜逵所選弟子及門生為千乘王

國郎朝夕受業黃門學者欣欣羨慕 紀建初元年十

二月戊申詔

見上

儒林傳序雖不立學官然皆擢高第

為講郎給事近職所以網羅遺逸博存衆家 古文四

十六卷為五十七篇毛詩二十九卷又故訓傳三十卷

左氏傳三十卷左氏微二篇公穀二家之經十一卷穀

梁傳十一卷外傳二十篇章句三十三篇

### 漢五經異義

儒林傳許慎字叔重博學以五經傳說臧否不同撰五

經異義又作說文解字十四篇

說文引用經傳多與今文不同

鄭玄

傳駁許慎五經異義 唐志許慎五經異義十卷

隋志同

鄭玄駁

齊志隋禮儀志引異義

書禮疏史記正義

引異義及鄭玄駁

堯典九族異義夏侯歐陽云云鄭

玄駁

史記注引鄭玄駁異義

禮記正義案異義公

羊說古春秋左氏說許慎案治魯詩韋玄成治易施犖

等說引外傳曰三王之樂可得觀乎鄭駁之云

異義今孝經說

云云

玉藻疏異義淳于登說明堂

樊僚以讖記正五

經異說 隋辛彥之撰五經異義一部

漢五經大夫

博士

見官制

五經師見小侯學

祭遵傳博士范升稱遵曰建為孔子立後秦置五經大夫

鄭氏九書

唐會要劉子玄孝經注議曰晉中經簿周易尚書尚書中侯大傳毛詩周禮儀禮禮記論語凡九書皆云鄭氏注名玄至於孝經則稱鄭氏解無名玄二字春秋緯演

孔圖云康成注三禮詩易尚書論語其春秋孝經別有  
評論 鄭引圖識皆謂之說易緯曰易說書緯曰書說  
嬾引祕書

魏六藝課試法

高堂隆傳景初中帝以蘇林秦靜等並老恐無能  
傳業者乃詔曰先聖餘教著於六藝六藝之文禮  
又為急今宿生巨儒並各年高教訓之道孰為其  
繼昔伏生將老漢文嗣以晁錯穀梁寡疇宣帝承

以十郎其科郎吏高才解經義者三十人從光祿  
勳隆散騎常侍林博士靜分受四經三禮主者具  
為設課試之法 文紀黃初五年四月立大學制  
五經課試之法 大學初立樂詳拜  
博士五業並授 魏畧黃初元  
年之後補舊石碑之缺備學士之員錄依漢甲乙  
以考課

漢五經論 晉五經然否論

譙周傳撰定法訓五經論古史考之屬百餘篇 秦宓

傳譙允南記錄其言為春秋然否論 隋志五經然否論五卷晉散騎常侍譙周撰 後漢禮儀志注引之

晉十九博士 太學石經

元帝紀大興二年六月置博士員五人四年三月置周易儀禮公羊博士 志晉初承魏制置博士十九人及咸寧四年武帝初立國子學定置國子祭酒博士各一人助教十五人江左初減為九人元帝末增儀禮春秋公羊博士各一人合為十一人後又增為十六人不復



分掌五經而謂之太學博士

元帝立儒林祭酒官以杜夷為之太元中增置太學

生百人以車武士領國子博士

荀崧傳元帝踐阼召拜尚書僕射轉

太常方修學校簡省博士置周易王氏尚書鄭氏古文

尚書孔氏毛詩鄭氏周官禮記鄭氏春秋左傳杜氏服

氏論語孝經鄭氏博士各一人凡九人其儀禮公羊穀

梁及鄭易皆省不置崧以為不可乃上疏曰世祖皇帝

經始明堂營建辟雍告朔頒正鄉飲大射西閣東序河

圖秘書禁籍臺省有宗廟太府金墉故事太學有石經

古文先儒典訓賈馬鄭杜服孔王何顏尹之徒章句傳  
注衆家之學置博士十九人猶選張華劉寔居太常之  
官以重儒教伏聞節省之制皆三分置二博士舊置十  
九人今五經合九人准古計今猶未能半今九人之外  
猶宜增四宜為鄭易置博士一人鄭儀禮春秋公羊穀  
梁博士各一人帝詔可共博議者詳之議者多請從崧  
所奏詔曰穀梁膚淺不足置博士 梁天監四年正月  
置五經博士各一人

晉五經通論

束皙傳著五經通論

晉五經同異評

儒林傳徐苗字叔胄為儒宗作五經同異評 隋志梁  
有五經異同評一卷賀瑒撰 北史張鳳著五經異同  
評十卷

晉五經音訓

儒林傳徐邈博涉多聞孝武延儒士謝安舉邈補中書

舍人侍西省雖不口傳章句然開釋文義標明指趣撰

正五經音訓學者宗之

又注穀梁

隋志徐邈五經音十卷

左傳正義晉宋古本序在集解之端徐邈定五經音

訓為此序作音

### 晉五經鈎沉

隋志五經鈎沉十卷

唐志同舊唐志云鈎深

晉高涼

一作梁

太守楊

方撰書目十卷晉高涼太守楊方撰

崇文目方作芳

自序云

晉太寧元年撰鈎經傳之沉義著論難以起滯

崇文目云篇第

亡缺今  
缺五篇

晉五經大義

隋志五經大義戴逵撰三卷後周樊文深撰十卷何妥  
撰五卷南史沈文阿撰經典大義十八卷

隋志十卷  
二卷陳

王元規續經典大義十四卷

齊中箱五經

南齊書衡陽王鈞手自細書寫五經部為一卷置於中  
箱中以備遺忘曰於檢閱既易且一更手寫永不忘諸

王爭效巾箱五經自此始

梁五經講疏

梁書武帝撰五經講疏使孔子祛閱羣書為義證釋乾

坤文言

張譏素  
憲與焉

簡文於玄圃述武帝所製五經講疏

後魏五經疑問

後魏書房景先作五經疑問百餘篇王神貴益之名為

辨疑合成十卷 常璩述六經畧注以廣制作 隋志

梁有五經咨疑八卷

周楊  
撰

唐志法家邯鄲綽五經析

疑三十卷 初學記引之

隋諸經義疏 六儒

儒林傳南北所治章句好尚不同

江左周易則王弼書則孔安國左傳則杜

元凱河洛左傳則服虔書易則鄭康成詩並主毛禮同遵鄭南人約簡得其英華北學深蕪窮其枝葉

高

祖遵問道之儀觀釋奠之禮博士罄傾河之辨侍中竭

重席之奧研覈異同渙焉冰釋二劉 焯焯 學通南北博極

今古所製諸經義疏搢紳咸師宗之 焯有五經述議賈馬王鄭所傳章

句多所是非焯有五經正名十二卷春秋毛詩述議皆四十卷論語述議十卷春秋攻昧十卷孝經述議五

卷尚書述議二十卷注詩序一  
後魏常爽述六經畧注

開皇初名山東義學

之士馬光張仲讓孔籠竇士榮張黑奴劉祖仁授太學

博士時人號為六儒

開皇五年四月乙巳詔  
名山東馬榮伯等六儒

### 五經決錄

文中子十四代祖述著春秋義統六代祖元則

宋仕述時

變論六篇其言化俗推移之理竭矣煥述五經決錄五

篇其言聖賢製述之意備矣虬北事魏述政大論八篇

其言帝王之道著矣彥述政小論八篇其言王霸之業



盡矣傑述皇極讜義九篇其言三才之去就深矣隆述  
興衰要論七篇其言六代之得失明矣今皆子謂董常  
曰吾欲修元經得皇極讜義焉欲續詩得時變論焉欲  
續書得政大論焉

唐十九家經解

藝文志經解類十九家二十六部三百八十一卷失姓  
名一

家劉向五經雜義七卷通義九卷要義五卷許慎異義

十卷鄭玄譙周然否論五卷楊方鈞沉十卷晉楊思咨

疑八卷

隋志咨疑  
周楊撰

元延明宗畧四十卷

隋二十  
三卷

劉炫正

名十二卷

並五  
經

沈文阿經典玄儒大義序錄十卷

隋二  
卷

班固等白虎通義六卷鄭玄六藝論一卷鄭志九卷鄭

記六卷王肅聖證論十一卷

隋十  
二卷

梁武帝孔子正言二

十卷

梁武帝撰五經講  
疏及孔子正言

簡文帝長春義記一百卷樊文

深七經義綱畧論二十卷

隋志二  
十九卷

又質疑五卷張譏游

玄桂林二十卷

隋志九卷南  
史二十四卷

謚法三卷

荀顛演  
劉熙注

沈約謚

例十卷賀琛謚法三卷

隋志云賀  
場五卷

集天名稱三卷陸德

明經典釋文三十卷顏師古匡繆正俗八卷不著錄十  
家一百二十七卷始於趙英五經對訣終於劉鎔經典  
集音有劉迅貺張鎰韋表微裴僑卿高重王彥威慕容  
宗本諸家 中興目二十一家四百八十四卷 續目  
三家十六卷

唐十一類經錄

志甲部經錄其類十一易書詩禮樂春秋孝經論語讖  
緯經解小學凡著錄四百四十家五百九十七部六千

一百四十五卷不著錄一百一十七家三千三百六十

卷

舊志十二類以小學訓詁分為二

隋志班固列六藝為九種或以

緯書解經合為十種凡六藝經緯六百二十七部五百三十七卷一卷通亡書合九百五十部七千二百九十卷

唐五經正義 五經義訓 義贊

志周易正義十六卷

國子祭酒孔穎達顏師古司馬才章王恭馬嘉運趙乾叶王談于志

寧等奉詔撰四門博士蘇德融趙弘智覆審

尚書正義二十卷

孔穎達王德韶李于雲撰

朱長才等五人覆審無忌勅  
志寧行成等二十三人刊定  
毛詩正義四十卷穎達德韶齊威

撰乾叶等三人覆正  
禮記正義七十卷穎達朱子奢李善信賈公彥柳士宣范義頤張權等

撰周玄達等四人覆審  
賈公彥禮記正義八十卷儀禮疏五十卷

周禮疏五十卷春秋正義三十六卷穎達楊士勛朱長才撰馬嘉運等四

人覆審楊士勛穀梁疏十二卷孔穎達傳初穎達與顏

師古司馬才章王恭王琰受詔撰五經義訓凡百餘篇

號義贊詔改為正義雖包貫異家為詳博其中不能無

冗繆孔陸正義釋文自多背馳博士馬嘉運駁正其失至相詆譏嘉運

貞觀十一年拜太學博士以正義繁釀故特撫其疵當世諸儒服其精有詔更令裁定功

未就永徽二年三月詔中書門下與國子三館博士弘

文館學士攷正之於是尚書左僕射于志寧右僕射張

行成侍中高季輔就加增損四年三月書始下三月一日

會要貞觀十二年國子祭酒孔穎達撰五經義疏一百

七十卷政要云一百八十卷名曰義贇有詔改為五經正義一本云初

太宗以師說多門章句繁雜命孔穎達與諸儒撰五經疏名五經正義太學博士馬嘉運

每持撫之有詔更令詳定未訖而卒永徽三年三月十

四日詔太尉趙公無忌等刊正四年三月一日進之正義

表永徽四年二月二十四日上頒于天下以為定式凡書二十卷詩四

十卷易十六卷春秋三十六卷二禮共百二十卷 舊

史貞觀七年十一月丁丑頒新定五經于天下永徽四

年三月壬子朔頒孔穎達五經正義於天下每年明經

依此攷試 儒學傳貞觀中廣學舍千二百區吐蕃高

麗等羣酋並遣子弟入學鼓箏踵堂凡八千餘人帝又

讐正五經謬缺頒天下示學者與諸儒會稗章句為義

疏俾久其傳

律疏序云近代已來兼經注而明之謂為義疏疏者識也

宋朝端拱

元年三月司業孔維等校五經正義百八十卷五月四

日鏤板盼行

孔維表云貞觀中祭酒孔穎達考前代之文採衆家之說隨經析理去短從長用功

二十餘年書成一

百八十卷 歐陽修以為晉宋而下師道漸亡各

為箋傳附著經文唐太宗始詔名儒撰定正義著為定

論凡不本正義者謂之異端則學者之宗師百世之取

信也然所載既博所擇不精多引讖緯之書異乎正義

之名欲詔名儒取九經之疏刪去讖緯之文然後經義



純一無雜 人自為說兩漢之俗也舉天下宗一說唐傳疏之學也

唐經典釋文

志陸德明經典釋文三十卷

第一卷序錄

舊史德明撰經

典釋文三十卷老子疏十五卷易疏二十卷太宗後閱

德明經典釋文甚嘉之賜家帛二百段

一本云貞觀十六年四月甲辰

太宗閱德明經典音義美其弘益學者賜其家布帛百匹

易古文書毛詩周禮儀

禮禮記三傳孝經論語老莊子爾雅等音合為三十卷

三帙

內老子釋文一卷莊子二卷

序曰楚夏聲異南北語殊搜訪

異同撰集為六經三傳釋文先儒舊音多不音注然讀

注不曉則經義難明德明乃并注音之古人音

書止為譬况孫炎始為反切

志又有劉鎔經典集音三十卷

校定釋文

見麟正五經類

集賢注記有敕依文字音

義改撰春秋毛詩莊子音張九齡奏校理官呂

證撰春秋音義鄭欽說撰毛詩音義甘暉衛包

撰莊子音義

見小學類

晁說之曰古人訓詁緩而

簡故其意全雖數十字而同一訓雖一字而兼數用

### 唐五經博士

官志五經博士各二人正五品上以其經之學教國子易書詩左氏春秋禮記為五經論語孝經爾雅不立官

附中經而已

會要太和七年八月九日

庚寅

置五經博

士一人

冊皇子  
畢下詔

國子監請秩比國子博士開成元年宰

相領祭酒鄭覃奏請給祿四年二月定為五品 舊紀

開成元年五月庚申判祭酒宰臣章奏太學新置五經  
博士各一人請依王府官賜祿粟

章傳云請太學五經  
經置博士祿廩比王

府官 一云八月  
己酉覃兼祭酒

唐開元詳定傳注四書

又見  
孝經

會要開元七年三月一日敕孝經尚書有古文本孔鄭  
注旨趣頗多踳駁令諸儒質定奏聞六日詔曰孝經獨  
宗鄭氏孔氏遺旨今則無文又子夏易傳近無習者輔  
嗣注老子亦甚甄明諸家所傳互有得失其令儒官詳

定所長令明經者習讀四月七日左庶子劉子玄上孝  
經注議曰孝經非玄所注其驗十有二條行孔廢鄭於  
義為允今俗所行老子河上公注序云漢文帝時人以  
所注老子授文帝因冲空上天乃不經之鄙言案漢藝  
文志注老子者三家河上所釋無聞焉豈如王弼注義  
旨為優又案漢志易有十三家而無子夏作傳者至梁  
阮氏七錄有子夏易六卷或云韓嬰作或云丁寬作豈  
非後來假憑先哲臣竊以鄭氏孝經河上老子二書訛

卷四十二  
舛不足流行孔王兩家實堪師授伏見去月十日敕令  
所司詳定四書得失云云臣議請行王孔二書國子祭  
酒司馬貞議曰孝經注縱非鄭氏所作而義旨敷暢近  
儒妄作孔傳偽作閨門一章近俗之語請鄭注孔傳依  
舊俱行河上憑虛立號漢史實無其人然其注以養神  
為宗無為為體辭近理弘王輔嗣理暢旨微請王河二  
注俱行又案劉向七畧有子夏易傳但此書不行已久  
今所存多失真本荀勗中經簿云子夏傳四卷或云丁

寬作是先達疑非子夏矣隋志子夏傳殘缺梁時六卷  
今二卷其書錯謬無益後學不可帖正經五月五日詔  
曰間者諸儒所傳頗乖通議崇孔學者冀鄭門之息滅  
尚今文者指左傳為誣偽河鄭二家可令仍舊行用王  
孔所注傳習者稀亦存繼絕之典子夏傳逸篇令帖易  
者停 劉子玄傳嘗議孝經鄭氏學非康成注舉十二  
條左證其謬當以古文為正易無子夏傳老子書無河  
上公注請存王弼學宰相宋璟等不然其論奏與諸儒

質辯司馬貞等阿意共黜其言請二家兼行惟子夏易  
傳請罷詔可

唐五經文字 九經字樣

見讎正五經

唐五經微旨

會要建中元年十月濠州刺史張鎰撰五經微旨十四  
卷孟子音義三卷上之 志經解類張鎰五經微旨十

四卷

鎰又撰三  
禮圖九卷



唐詳校九經

會要貞元二年七月祕書監劉大真上言請擇儒者詳校九經於祕書省令所司陳設及供食物宰臣錄其課效從之

尋阻衆議寢不行

唐六經法言 五經法言

韋處厚傳穆宗立處厚為翰林侍講學士以帝冲怠不向學與路隋合詩書易春秋禮孝經論語撮其粹要題為六經法言二十篇上之冀助省覽帝稱善並賜金幣

集序云  
賜金紫

舊史韋處厚傳穆宗荒怠乃銓擇經義雅言

以類相從為二十卷謂之六經法言獻之賜繒帛銀器

仍賜金紫 路隋傳與韋處厚同入翰林為侍講學士

採三代皇王興衰著六經法言奏之

冊府元龜云賜錦  
綵銀器錫服遷官

會要長慶二年四月癸未翰林侍講學士韋處厚路

隋撰五經法言二十卷上之

表曰魏稱皇覽梁著遍畧  
鄴中有修文之作江左有

壽光之書但夸衒於  
見聞非垂謨於理本

志儒家類六經法言二十卷韋

處厚路隋撰李襲譽五經妙言四十卷鄭澣經史要錄

二十卷

唐六經要言 諸經纂要

崔郾傳敬宗嗣位郾自侍講學士進中書舍人謝曰陛下使臣侍講歷半歲不一問經義臣無功不足以副厚恩帝曰朕少間當請益高鉞適在旁因言陛下樂善而無所諮詢天下之人不知有嚮儒意帝重咎謝賜錦幣與高重類六經要言為十篇上之以便觀省敬宗置侍講學士甚艱其選高重以簡厚淳正崔郾皆預郾寶歷元年為學士由學士遷中書舍人志儒家類諸

經纂要十卷

崔

會要寶歷元年三月高重崔郾進纂

要一卷 舊史郾與高重抄撮六經嘉言要道區分事

類凡十卷名曰諸經纂要冀人主易省覽賜錦綵銀器

### 唐白氏經史事類

志類書白氏經史事類三十卷白居易撰一名六帖

居易

著事類集要三十部合一千一百三十門時人目為六帖

盛均十三家帖以白氏六

帖未備而廣之

卷七

元稹類集三百卷

集古今刑政之書

中興

書目居易採經傳百家之語摘其英華以類分門悉注

所出卷帙名氏於其下

孔傳亦有六帖合為一書

皇朝陳紹重廣

六帖學林三十卷

紹興中陳天麟類班史為前漢六

帖十二卷

唐九經師授譜

韋表微傳

見春秋類

志一卷

宋朝李燾著五經傳授尚

書百篇圖各一卷

崇文總目有授經圖三卷

唐經史要錄

鄭澣傳文宗時入翰林為侍講學士帝使粹擷經史為

要錄愛其博而精試舉諸條擿問之隨即酬析無留答

因賜金紫服

舊史云以十九書語類親自發問

藝文志鄭澣經史要

錄二十卷

儒家

唐經史釋題

志目錄類李肇二卷

崇文目同書目釋文題三卷

序云經以學令

為定以藝文志為編史以史通為準各列其題從而釋之

唐微言注集

志經解類裴僑卿二卷開元中鄭縣尉上之

唐六說 六經外傳

志劉迅六說五卷劉貺六經外傳三十七卷

經解類

傳

迅續詩書春秋禮樂五說書成不以示人 書目迅作

六書以繼六經標作書之誼而著其目惟易闕而不叙

一本云劉迅著書以擬六經此乃其叙篇唯易闕而不言故止五卷

唐五經類語

志經解類慕容宗本十卷

大中時

李適傳撰九經要句

唐五經妙言

志儒家李襲譽四十卷

唐諸經義樞

尹思貞撰諸經義樞續史記皆未就

端拱校五經正義

見讎正五經

咸平校定七經疏義

見讎正五經書目劉敞七經小傳五卷雜釋詩書春



秋周禮儀禮禮記論語七經劉彝七經義一百七十卷  
有易無儀禮景德二年龍圖閣經典門總三千三百四

十一卷目錄三十卷正經三百一十四卷經解千  
三十五卷訓詁四百九十五卷六月庚寅國子監  
上新刻公穀傳周禮儀禮正義印板先是後唐長  
興中雕九經板本而正義傳寫踏駁太宗命刊校  
雕印而四經未畢上遣直講王煥就杭州刊板至  
是皆備十月甲申賜輔臣親王周禮儀禮公穀傳

疏

祥符九經餘義

實錄祥符五年正月癸未以懷安軍鹿鳴山人黃敏

書目

云黃敏求

為本軍助教敏明經術嘗著九經餘義四百九十

三篇

會要無三字

轉運使滕陟

一作涉

以其書上進帝命學士

晁迥等看詳迥等言所著撰可採故特有是命

會要同

書目一百卷

崇文目同

注疏之外言其餘義凡四百九十有

四篇

總九經兼孝經論語

胡旦演聖通論七十二卷論六經傳

注得失易十六書七詩十禮記十六春秋論別行

晁氏志四

十九卷博辯精

詳學者宗焉

皇祐五經精義 天聖經典徽言

皇祐三年十月丙申詔楊安國等以五經正義節解為書令先撰序及名丁酉安國等請名曰五經義宗精義樞要詔以五經精義為名十二月己亥御延和殿安國等上五經精義序進讀畢賜茶而退辛丑降付邇英閣四年六月壬寅延和殿侍講學士上五經精義周易節

解二十卷十一月甲寅御邇英閣侍讀上尚書節解三

十卷五年四月癸卯上禮記解九十卷十月

一本十月

寅上春秋節解八十卷仁宗又命侍讀丁度等修纂五

經精義周易節解度等言詩書凶服及春秋賊亂皆舊

所不講今去留係上旨上曰先王吉凶之制百代所遵

不可以俗忌而簡去春秋喪亂之事皆有善惡鑒戒人

主所宜知也亦當存之又曰先儒於經籍有一字之誤

者朕未嘗有所改易以正經之義而刪去邪又神宗實

錄盧士宗在經筵撰五經精義上之詔藏史館

天聖初孫奭撮五經切治道者為五十篇號經典

徽言上之

實錄五十卷又撰五經節解

皇祐之前寫尚書無

逸於屏則景祐二年正月也李淑勸講春秋則寶元二年也曾公亮講詩於慶厯之五年王洙講易於至和元年

紹興三經義辨 辨學

紹興五年六月三日己巳起居郎朱震言故龍圖閣學

士楊時所著三經義辨請令本家抄錄投進 書目三

經義辨十卷辨王安石書詩周禮三經義之失是歲三

月庚子王居正進辨學七卷四十二篇詔送秘書省

時居正為

兵部侍郎

### 紹興六經圖

書目六卷紹興中布衣楊甲撰乾道中毛邦翰復增補  
之易七十書五十有五詩四十有七周禮六十有五禮  
記四十有三春秋二十有九合為圖三百有九

乾道四經解

九年閏正月二十三日敷文直學士胡銓言聖訓令臣  
進所解諸經今先繕寫周易周禮禮記春秋四經解詔  
令投進 紹興十六年九月吳沆進羣經正論四卷  
康成注禮與其書易相偕元凱解傳無係毛鄭詩文  
心誦腹藏壁扃岩鏹濟秦之險以通於漢者萬無一二  
訓故之病黨枯護朽守缺保殘有不非鄭服之陋無  
是正左班之忠 詩熄轅韓禮興后戴易有无咎悔亡

之脫經存郭公夏五之疑齊論多於魯論舜典合  
於堯典 邪釋繆解正漫真渝 以禹貢行河以  
春秋斷獄以三百五篇諫六經之用果止於是歟  
是自夫子既成六經之後尚為未試之書也鄭康  
成注二禮引易說書說樂說春秋說禮家說孝經  
說皆緯候也河洛七緯合為八十一篇河圖九篇洛書  
六篇又別有三十篇七經緯三十六篇易緯稽覽圖乾  
鑿度坤靈圖通卦驗是類謀辨終備書緯璇璣鈴考靈



曜刑德放帝命驗運期授詩緯推度災沴歷樞含神務  
禮緯含文嘉稽命徵斗威儀樂緯動聲儀稽耀嘉汁圖  
徵孝經緯援神契鈎命決春秋緯演孔圖元命包文耀  
鈎運斗樞感精符合誠圖考異郵保乾圖漢含孽佑助  
期握誠圖潛潭巴說題辭又有尚書中候論語讖在七  
緯之外按李尋有五經六緯之言蓋起於哀平至光武  
篤信之諸儒習為內學隋焚其書今唯易緯存焉正義  
多引讖緯歐陽公欲取九經之疏刪去讖緯之文使學

者不為怪異之言惑亂然後經義純一其言不果行又見

困學  
紀聞

玉海卷四十二

欽定四庫全書

玉海卷四十三

宋 王應麟 撰

藝文

讎正五經 石經

荀悅申鑿仲尼作經本一而已古今文不同而皆自  
謂真本經古今先師義一而已異家別說不同皆自  
謂真古今秦之滅學也書藏於屋壁義絕於朝野漢

興收撫散滯固已無全學矣文有磨滅言有楚夏出  
有先後或學者先意有所借定後進相放彌以滋蔓  
故一原十流

漢校中五經秘書

成紀河平二年光祿大夫劉向校中秘書

師古曰言中以別外劉

向傳領校中五經秘書

志注臣向與長社尉參校中秘書  
向校書天祿閣感青藜之

異 志向以中古文易校施孟梁丘經或脫去无咎

悔亡唯費氏與古文同書以中古文校三家經文

酒誥脫簡一召誥脫簡二文字異七百餘脫字數  
十向校書得樂記二十三篇與王禹不同向云古  
孝經庶人章分為二曾子敢問章為三又多一章  
儒林傳劉向校書考易說以為諸家皆祖田何  
楊丁大誼畧同唯京氏為異張霸以能為百兩徵  
以中書校之非是乃黜其書 論語序向言魯二  
十篇齊二十二篇古二十一篇篇次不與齊魯論  
同

劉歆河平中受詔與父向領校秘書向死哀帝初復領

五經卒父前業乃集六藝羣書種別為七畧

隋志向卒子歆乃徙

溫室中書於天祿閣上遂總括羣篇撮其指要著為七畧

尹咸與歆共校經傳歆曰

古文逸禮書春秋左氏皆古文舊書多者二十餘通臧

祕府成帝陳發祕藏校理舊文得此三事考學官所傳

經或脫簡傳或間編

又移書揚雄曰三代之書蘊藏於家直不計耳

叙傳班

歆與劉向校秘書受詔進讀羣書賜以秘書之副後

漢蘇竟與劉龔

歆兄子

書昔以摩研編削之才與國師公

歆校定秘書 張衡曰劉向父子領校秘書閱定九流亦無讖錄 北史向受詔校書每一書竟表上輒言臣向書長水校尉臣參書太常博士書中外書合若干本以相比校然後殺青 隋志漢初河間獻王又得仲尼弟子及後學者所記一百三十一篇獻之時亦無傳之者至劉向考校經籍檢得一百三十篇因第而叙之左氏云云劉歆典校經籍考而正之欲立於學孝經至劉向典校經籍以顏本比古文除其繁惑以十八章為定

戰國策書錄云中書餘卷錯亂相糅云云本字多誤  
脫為半字以趙為肖以齊為立皆定以殺青書可繕寫

荀卿書所校讎中書凡三百三十二篇定著三十二

篇以殺青書 列子所校中書五篇謹與長社尉臣參

校讎太常書三篇太史書四篇臣向書六篇臣參書二

篇內外書凡二十篇定著八篇或字誤以盡為進以賢

為形及在新書有棧校讎從中書已定以殺青書

永始二年

八月壬寅上

管子新書目錄云臣參書四十一篇

儀禮



疏劉向別錄大射以上七篇與小戴同其下乃以聘食  
覲禮至有司為次皆尊卑吉凶次第倫叙 後吳祐傳

父恢欲殺青簡寫經書注亦謂汗簡義見劉向別錄

風俗通劉向典校書籍皆先書竹為易刊定可繕寫者

以上素也今東觀書竹素

見文選注

唐司馬貞曰按劉向

七畧有子夏易傳 說文祕書說日月為易 揚雄傳

校書天祿閣 孔叢子孔子元以郎校書 校祕書郎

楊閣

漢曲臺校書

儒林傳后倉說禮數萬言號曰后氏曲臺記注服虔曰  
在曲臺校書著記因以為名師古曰曲臺殿在未央宮

漢校定中書五經 正五經文字

列傳伏無忌順帝時為侍中屯騎校尉永和元年詔無  
忌與議郎黃景校定中書五經諸子百家藝術元嘉中

成

中書內  
中之書

盧植熹平間時始立太學石經以正五經

文字植上書云云

見禮  
類

拜議郎與諫議大夫馬日磾議

郎蔡邕楊彪韓說等並在東觀校中書五經記傳補續

漢記

言中書以別於外也

帝以非急務轉為侍中

劉珍

文苑

永初

中

安帝紀永初四年二月乙亥

為謁者僕射鄧太后詔使與校書劉

駒駱馬融及五經博士校定東觀五經諸子傳記百家

藝術整齊脫誤是正文字

蔡倫

宦者

元初四年帝以經

傳之文多不正定乃選通儒謁者劉珍及博士良史詣

東觀各讎校漢家法令倫監典其事 崔寔與諸儒博

士雜定五經 樊儵永平元年為長水校尉以讖記正

五經異說 班固永平中為郎典校秘書 馬融詣東

觀典校秘書

張駟

儒林

拜議郎與蔡邕共奏定六經文

字擢侍中典領秘書

傅毅

文苑

建初中拜郎中與班固

賈逵共典校書

### 漢石經

蔡邕傳建寧中校書東觀遷議郎邕以經籍去聖久遠  
文字多謬俗儒穿鑿疑誤後學熹平四年與五官中郎  
將堂谿典光祿大夫楊賜諫議大夫馬日磾議郎張子

雋馴韓說太史令單颺等奏求正定六經文字許之邕  
乃自書丹於碑使工鐫刻石立於太學門外後儒晚學  
咸取正焉碑始立觀視摹寫者車乘日千餘兩填塞街  
陌注洛陽記曰太學在洛陽南開陽門外講堂長十丈  
廣三丈堂前石經四部本碑凡四十六枚西行尚書周  
易公羊傳十六碑存十二碑毀南行禮記十五碑悉壞  
東行論語三碑二碑毀禮記碑上有諫議大夫馬日磾  
議郎蔡邕名 儒林傳叙熹平四年詔諸儒正定五經

刊於石碑為古文篆隸三體書法以相參檢植之學門  
使天下取則注謝承書碑立太學門外瓦屋覆之四面  
欄障開門於南河南郡設吏卒視之洛陽記云碑高一

丈許廣四尺駢羅相接 靈紀熹平四年春三月詔諸

儒正五經文字刻石立于太學門外

盧植傳上書願合尚書章句考禮記

失得刊  
正碑文

宦者傳李巡以為諸博士試甲乙科爭第高

下更相告言至有行賂定蘭臺漆書經字以合私文者  
乃白帝與諸儒共刻五經文於石詔蔡邕正其文字五

經一定爭者用息 隋志鐫刻七經著於石碑皆蔡邕

所書三字石經尚書九卷

梁有十三卷

又五卷春秋三卷

梁有

十二卷

唐志小學類三字石經尚書古篆三卷

左傳古

篆書十二卷

又蔡邕今字石經論語二卷

金石錄石經遺字為三卷

云蔡邕所書乃八分而三體石經乃魏時所建也遺字

有尚書公羊傳論語又有詩儀禮則所立不止六經矣

論語公羊後有堂谿典馬日磾等姓名世所傳經書校

此不同者數百言篇第亦時有小異 水經注漢光

六年刻石鏤碑載五經立於太學講堂前悉在東側 北史江式曰蔡邕採李斯曹喜之法為古今雜形詔於太學立石碑刊載五經題書楷法多是邕書後開鴻都諸方獻篆無出邕者 魏陳留邯鄲淳特善倉雅許氏字指八體六書精究閑理以書教諸皇子又建三字石經於漢碑西其文蔚煥三體復宣校之說文篆隸大同而古字少異 左傳正義石經古文虞作魯魯作表



魏石經 晉石經

隋志魏正始中立一字石經相承以為七經正字後東

魏末

武定四年八月

自洛陽徙于鄴都至河陽没于水得至鄴

者不盈大半

高澄遷洛陽漢魏石經五十二碑于鄴齊皇建元年八月列學館後周大象元年徙

洛陽隋開皇六年又自鄴京載入長安置于祕書內省議

欲補緝立于國學隋亂事寢營造之司用為柱礎貞觀

初祕書監魏徵始收聚之十不存一其相承傳拓之本

猶在祕府

合五十一卷有一字三字之分

并秦帝

會稽

刻石卷

一以備小學

一字石經周易一卷

梁有三卷

尚書六卷

梁有今字石經鄭氏尚書八卷魯

詩六卷

梁有毛詩三卷

儀禮九卷春秋一卷公羊傳九卷論語

一卷

梁有二卷

典論一卷

魏志注明帝詔先帝典論刊石于廟堂之外及太學與石經並以永

示來世

魏都賦菲言厚行陶化染學警校篆籀篇章畢覲

晉傅衛恒曰正始中立

三字石經

江式云魏建三字石經于漢碑西邯鄲淳所書

裴頠轉祭酒奏脩

國學刻石寫經

唐六典注傅暢晉諸公讚裴頠為國子祭酒奏立國子太學起講堂築門闕刻

石寫五經

荀崧上疏曰太學有石經古文 後魏書孝文

太和十七年九月壬申幸太學觀石經神龜元年五月

祭酒崔光請命博士李郁等補漢所立三字石經之殘  
缺 劉芳傳漢世造三字石經於太學學者文字不正  
多往質焉芳音義明辨時號劉石經 隋劉焯傳運洛  
陽石經至京師文字磨滅莫能知者救與劉炫等考定  
唐志小學類今字石經易篆三卷書五卷鄭玄書八  
卷毛詩三卷儀禮四卷左傳經十卷公羊傳九卷蔡邕  
今字論語三卷三字石經尚書古篆三卷左傳古篆十  
二卷合五十九卷

開元  
著錄

隋秘書省攷定羣言

傳劉焯與諸儒於秘書省攷定羣言 蕭該開皇

初奉詔與何妥正定經史 韋孝寬後周明帝初

參麟趾殿學士考校圖籍 北齊郎茂於秘書省

刊定載籍

唐秘書省攷定五經

儒學傳序太宗讐正五經謬缺頒天下示學者 顏師古

傳太宗拜中書侍郎帝嘗歎五經去聖遠傳習寢訛詔

師古於祕書省考定多所釐正

政要貞觀四年

既成悉詔諸儒

議

政要云詔左僕射房玄齡集諸儒詳議

人執所習共非詰師古輒引晉

宋舊文隨方曉荅誼據該明出其悟表人人歎服帝因

盼所定書於天下

舊紀貞觀七年十一月丁丑頒新定五經

學者賴之拜祕

書少監專刊正事古篇竒字世所惑者討析申熟必暢

本源 會要貞元二年七月祕書監劉太真請擇儒者

詳校九經於祕書省從之尋寢不行 紀景龍二年六

月庚子詔括天下圖籍

唐刊正四部羣書

會要乾封元年十月十四日上以四部羣書傳寫訛謬  
乃詔東臺侍郎趙仁本蘭臺侍郎李懷儼東臺舍人張  
文瓘等集儒學之士刊正然後繕寫開元七年五月整  
比四部書開成元年七月分察使奏祕書省四庫見在  
新舊書籍共五萬六千四百七十六卷隨日校勘九月  
敕欠書四萬五千二百六十一卷令諸道繕寫大中三  
年正月校寫四百十九卷四年寫三百六十五卷五年

正月校勘四百五十二卷

唐集賢殿校理經籍

見院類

唐壁經

會要元和十四年十二月祭酒鄭餘慶奏修壁經 文  
粹劉禹錫國學新脩五經壁記云初大厯中名儒張參  
為司業始詳定五經書于論堂東西廂之壁辨齊魯之  
音考古今之文積六十載汗剝不鮮今天子尚文章尊

典籍成均以治學上言遽賜千萬祭酒俾齊博士公肅

韋再新壁書懲前土塗不克以壽乃析堅木負墉而比

之製如版牘平如粉澤申命國子能通書法者繕寫筆

削既成讎校既精白黑彬班瞭然飛動以蒙來求煥若

星辰以敬來趨肅如神明以疑來質決若著蔡文苑

英華太學壁經賦置六經於屋壁作羣儒之龜鏡垂露

懸鍼鶴頭蚊足酌前脩之規楷為後來之軌躅

唐石經 後唐九經刻板



鄭覃傳文宗以覃名儒以宰相領祭酒請太學五經置

博士

開成元年

始覃又以經籍刊繆博士陋淺不能正建言

願與鉅學鴻生共力讐刊準漢舊事鏤石太學示萬世

法詔可覃乃表周墀崔球張次宗孔溫業等是正其文

刻于石 高重傳為祭酒與鄭覃判定九經于石 儒

學傳序文宗定五經鑱之石張參等是正訛文

參乃大歷中司

業序 會要太和七年二月五日敕唐玄度覆定石經

誤 字體十二月敕於國子監講論堂兩廊創立石九經并

孝經論語爾雅共一百五十九卷字樣四十卷

又見後九經字

樣

通監開成二年冬十月國子監石經成

舊紀開

成二年十月癸卯宰臣判祭酒鄭覃進石壁九經一百

六十卷

唐玄度覆校字體乖師法名儒皆不窺之

文粹李陽冰論古篆願

刻石作篆備書六經立於明堂為不刊之典號曰大唐

石經使百代之後無所損益 後唐長興三年二月令

國子監校正九經以西京石經本抄寫刻板頒天下四

月命馬鎬陳觀田敏詳勘周廣順三年六月丁巳十一經

及爾雅五經文字九經字樣板成判監田敏上之

各二部一

百三十冊四門博士李鶚書惟公羊前三禮郭嶼書

顯德二年二月校勘經典釋

文三十卷雕印命張昭田敏詳校 偽蜀相母昭裔取唐

大和本琢石於成都學官與後唐板本不無小異乾道

中晁公武參校二本取經文不同者三百二科著石經

考異亦刻於石張奐又校注文同異為石經注文考異

四十卷

唐九經字樣 五經文字

見上 又見石經十體書

會要開成二年

丁巳歲

八月國子監奏覆定五經字體官

翰林待詔唐玄度狀準大和七年二月五日敕覆定九經字體今所詳覆多因司業張參五經字為準其舊字樣歲月將久點畫參差傳寫相承漸致訛誤今依字樣參詳改正諸經別有疑闕舊字樣未載者古今體異雖篆隸不同摠據說文即古體驚俗近代文字或傳寫乖訛今與校勘官取其適中纂錄為新加九經字樣一卷請附于五經字樣之末從之 志小學類張參五經文

字三卷

崇文目同

唐玄度九經字樣一卷

文宗時待詔崇文目同

歐陽

融經典分毫正字一卷

崇文目同

中興書目字樣一卷開

成丁巳歲唐玄度撰序曰奉詔覆定國學石經字體刪

補張參五經文字采其疑誤舊未載者撰成一卷凡七

十六部五經文字五卷大歷十一年司業張參撰序曰

詔委儒官勘校經本乃命孝廉生顏傳經收拾疑文互

體受法師儒取說文字林蔡邕石經陸德明釋文為定

例凡一百六十部非經典文義所在皆不集錄 大歷

十年司業張參纂成五經文字以類相從開成中翰林待詔唐玄度加九經字樣補所不載晉開運末祭酒田敏合二者為一編以考正俗體訛謬 後周廣順三年

六月田敏進印板九經書五經文字樣各二部一百三十冊 宋朝重和元年十一月二十八日言者謂張參唐玄度所撰五經文字九經字樣辨證書名頗有依據然其法本取蔡邕石經許氏說文宜重加脩定分次部類為新定五經字樣從之 春秋正義字則變古為篆

改篆為隸書則縑以代簡紙以代縑轉寫失真因循莫改執文求義理必不通

宋朝石經

書目石經七十五卷楊南仲書周易十書十三詩二十春秋十二禮記二十皆具真篆二體 石室十三經孟蜀所鐫故周易後書廣政十四年歲次辛亥五月二十日唯三傳至皇祐初方畢故公羊傳後書大宋皇祐元年歲次己丑九月辛卯朔十五日乙巳

工畢 周易孫逢吉書尚書周德正書毛詩張紹文書  
周禮孫朋吉書儀禮張紹文書禮記張紹文書春秋經  
傳公穀不題書人論語爾雅張德釗書孝經孟子不題  
書人

乾德求書

國初三館書才萬三千餘卷乾德四年五月乙亥收偽  
蜀圖書付史館凡一萬三千卷閏八月詔求遺書涉弼  
等應詔獻書總千二百二十八卷分寘書府開寶九年



得江南圖書二萬餘卷興國二年十月訪先賢墨跡圖  
書九年正月壬戌命三館比校開元四部書目訪其闕  
逸及三百卷者甄錄至道元年六月十日命裴愈求圖  
籍咸平四年十月甲子二十七日詔曰國家設廣內石渠之  
宇訪羽陵汲冢之書廣獻書之路每卷給千錢三百卷  
以上量才錄用祥符中獻書者十九人賜出身景祐三年五月遣使求  
館閣逸書嘉祐五年八月壬申詔祕府書視開元錄多  
遺軼開賞科以廣獻書之路 紹興二年二月甲子詔

平江守臣訪求圖籍四月詔分經史子集四庫分官日

校三年四月二十一日劉岑請詔求四方求遺書從之

十三年十月九日一云九月二十九日又詔廣行訪募法漢氏之

前規精校遺亡按開元之舊目十四年五月二十八日

戊寅中興書目有嘉祐搜遵熙寧七年之制復置補寫所訪闕書目紹興求書

闕記 漢陳農奉求書之十六年七月乙酉陳泰初進詔唐苗發分出使之權

神哲御集百有十八冊上諭大臣令立定賞格重則進

官輕則賜帛壬辰提舉祕書省秦熺立定獻書賞格詔

鏤板行下

開寶校釋文

周顯德中

二年

詔刻序錄易書周禮儀禮四經釋文皆

田敏尹拙聶崇義校勘自是相繼校勘禮記三傳毛詩

音並拙等校勘建隆三年判監崔頌等上新校禮記釋

文開寶五年判監陳鄂與姜融等四人校孝經論語爾

雅釋文上之二月李昉知制誥李穆扈蒙校定尚書釋

文

德明釋文用古文尚書命判監周惟簡與陳鄂重修定詔並刻板頒行

咸平二年十

月十六日直講孫奭請摹印古文尚書音義與新定釋  
文並行從之是書周顯德六年田敏等校勘郭忠恕覆  
定古文並書刻板 景德二年二月甲辰命孫奭杜鎬  
校定莊子釋文 爾雅音義二卷釋智騫所撰吳鉉駁  
其舛誤天聖四年五月戊戌國子監請摹印德明音義  
二卷頒行先是景德二年四月丁酉吳鉉言國學板本  
爾雅釋文多誤命杜鎬孫奭詳定

端拱校五經正義

端拱元年三月司業孔維等奉敕校勘孔頴達五經正義百八十卷詔國子監鏤板行之易則維等四人校勘李說等六人詳勘又再校十月板成以獻書亦如之二年十月以獻春秋則維等二人校王炳等三人詳校邵世隆再校淳化元年十月板成詩則李覺等五人再校畢道昇等五人詳勘孔維等五人校勘淳化三年壬辰四月以獻禮記則胡迪等五人校勘紀自成等七人再校李至等詳定淳化五年五月以獻

淳化三年以前印板名前資官或進

士寫是年判監李至言義疏釋文尚有訛舛宜更加刊

定杜鎬孫奭崔頤正苦學強記請命之覆校至道二年  
至請命禮部侍郎李沆校理杜鎬吳淑直講崔偓佺孫  
奭崔頤正校定咸平元年正月丁丑劉可名上言諸經  
板本多誤上令頤正詳校可名奏詩書正義差誤事二  
月庚戌奭等改正九十四字沆預政二年命祭酒邢昺  
代領其事舒雅李維李慕清王渙劉士元預焉五經正

義始畢

國子監刻諸經正義板以趙安仁  
有蒼雅之學奏留書之踰年而畢

淳化校三史 嘉祐校七史

淳化五年七月詔選官分校史記前後漢書杜鎬舒雅  
吳淑潘慎修校史記朱昂再校陳充阮思道尹少連趙  
况趙安仁孫何校前後漢書咸平中以校勘未精命陳  
堯佐等覆校史記景德元年正月丙午任隨等上覆校  
史記刊誤文字五卷賜帛丁未命刁衍晁迥丁遜覆校  
前後漢書二年七月壬戌衍等上覆校前漢書板本刊  
正三千餘字錄為六卷上之賜器帛

今所行止淳  
化中定本

咸

平三年十月校三國志晉唐書五年畢

唐書將別修不刻板

乾

興元年十一月戊寅校定後漢志三十卷頒行 天聖

二年六月辛酉校南北史隋書

四年十一月畢

景祐元年四

月丙辰命宋祁等覆校南北史九月癸卯詔選官校正

史記前後漢書三國志晉書二年九月壬辰詔翰林學

士張觀刊定前漢書下冑監昉行秘書丞余靖請刊正

前漢書因詔靖盡取祕閣古本對校踰年乃上漢書刊

誤三十卷至是改舊摹板 嘉祐六年八月校梁陳等



書鏤板七年冬始集八年七月陳書始校定 熙寧二

年八月六日庚子進新校漢書

崇文目三史刊  
誤四十五卷

咸平

元年七月甲申賜諸王及輔臣新印三史嘉祐六年  
八月庚申詔三館秘閣校理宋齊梁陳後魏周北齊  
七史書有不全者訪求之

咸平校定七經疏義

咸平三年三月癸巳命國子祭酒邢昺等校定周禮儀  
禮公羊穀梁傳正義又重定孝經論語爾雅正義四年

九月丁亥一作丁丑翰林侍講學士邢昺等及直講崔嵬佷

表上重校定周禮儀禮公穀傳孝經論語爾雅七經疏

義凡一百六十五卷賜宴國子監昺加一階餘遷秩一本

云一百六十三卷十月九日命摹印頒行於是九經疏義具矣

詳見論語類

### 咸平校三館書籍

五年十二月甲申令流內銓於常選擇知書者以名聞  
初詔寫三館書籍一本置龍圖閣一本藏後苑皆以館

閣官分校上閱之見其尚有舛誤而未讎對者猶二萬  
卷故擇官詳校命吏部侍郎陳恕知制誥楊億試十五  
人得館陶尉劉均等七人於崇文院校勘詳見書目先是咸  
平二年閏三月甲午令三館寫四部書一本來上

景德羣書漆板 刊正四經

咸平元年正月丁丑劉可名上言諸經板本多誤上令  
擇官詳校景德二年五月一日戊申幸國子監歷覽書  
庫觀羣書漆板問祭酒邢昺曰板數幾何昺曰國初印

板止及四千今僅至十萬經史義疏悉備帝曰非四方無事何以臻此因益書庫十步以廣所藏又詔褒之九月辛亥命侍講學士邢昺與兩制詳定尚書論語孝經爾雅文字先是國子監言羣經摹印歲深字體誤缺請重刻板因命崇文檢詳杜鎬諸王侍講孫奭詳校至是畢又詔昺與兩制詳定而刊正之祥符七年九月又并易詩重刻板本仍命陳彭年馮元校定自後九經及釋文有訛缺者皆重校刻板天禧元年九月癸亥詔國子

監羣書更不增價五年五月辛丑令國子監重刻經書

印板以歲久剝損也

天聖八年九月十二日重刊詩書釋文

嘉祐七年

十二月詔以七史板本四百六十四卷送國子監鏤板  
頒行唯開寶所脩五代史未布以俟筆削 紹興九年

九月七日詔下諸郡索國子監元頒善本校對鏤板十

五年閏十一月博士王之望請羣經義疏未有板者令

臨安府雕造二十一年五月詔令國子監訪尋五經三

館舊監本刻板上曰其他闕書亦令次第鏤板雖重有

所費亦不惜也。繇是經籍復全。五代始用木板。

摹六經

蜀母昭喬亦請刻板印九經蜀主從之

太宗朝又摹印司馬

班范諸史與六經皆傳於是世之寫本悉不用然

墨板訛駁初不是正而學者無他本刊驗司馬范

諸史尤多脫亂其後不復有古本可證。國史志唐末

益州始有墨板多術數字學小書後唐詔儒臣田敏校

九經鏤本于國子監國初廣諸義疏音釋令孔維邢曷

讎定頒布後又作三體石經訂正文字於是經書大備

景德校諸子

咸平六年四月命杜鎬等校道德經六月畢 景德二

年二月甲辰校定莊子并以釋文三卷鏤板後又命李宗

諤等讎校莊子序 祥符四年三月校列子五年四月

上新印列子十月校孟子孫奭等言孟子有張鎰丁公

著二家撰錄今采衆家之長為音義二卷是年四月以進七年

正月上新印孟子及音義唐志張鎰孟子音義三卷

景德校新寫御書

見書目

祥符校館閣羣書

八年十二月甲辰命樞密使王欽若提點抄寫三館秘閣書籍翰林學士陳彭年副之初館閣以其夏四月壬申火多闕書故命抄寫十月丙午命吏部取選人先試判擇可者送學士院試詩賦論命入館校勘三年改官京官校勘三年授校理後校勘四年授校理自晁宗慤始彭年請以直館校理等為校勘官又命學士晁迥等



選宋綬等覆校凡校勘官校畢送覆校覆校畢送主判館閣官詳校復命兩制充覆點檢皆有程課以考勤怠

景祐見書目

實錄八年十月丙午以丁拱為館閣校勘令

流內銓選有文學者赴館閣校勘羣書

### 康定羣經音辨

書目七卷

國史志同或云十卷

天章閣侍講賈昌朝撰進凡五門

一辨字同音異二辨字音清濁三辨彼此異音四辨字音疑混五辨字訓得失康定二年詔刊行 晁氏志賈

昌朝羣經音辨七卷先是大臣稽古不過秦漢引經議政蓋自昌朝始此書以古今多通借音詁乃辨正之凡五門 寶元二年十一月三日令崇文苑雕印頒行  
唐顏師古撰匡繆正俗八卷

至和石經

元年八月十六日己酉命皇姪右屯衛大將軍克繼書國子監石經以上所寫石經論語求書石國子監帝欲旌勸宗室特從其請二年九月十五日功畢上之賜銀

幣

嘉祐石經

仁宗命國子監取易詩書周禮禮記春秋孝經為篆隸  
二體刻石兩楹 至和二年三月五日判國子監王洙  
言國子監刊立石經至今一十五年止孝經刊畢尚書  
論語見書鐫未就乞促近限畢工餘經權罷從之 嘉

祐三年五月十五日王洙薦大理丞楊南仲石經有勞

賜出身六年二月一日

乙卯朔

國子監言草澤章友直篆

石經畢詔補試將作監主簿友直不願仕賜以銀絹

六月庚申

五月以同篆石經殿中丞張次立與堂除

熙寧是正文字

二年八月庚子參政趙抃進新校漢書及陳繹所著是正文字七卷賜繹銀帛 元豐五年王安石表上字說

二十四卷紹聖二年十一月八日龔原請雕印 政和

七年二月十一日唐耜上字說集解三十部一百二十

卷 大觀中張有校正俗書與古字戾者集三千餘字

名之曰復古編二卷揚時為後序形聲近似而用或不  
同辨析皆有稽據 汪藻古今雅俗字四十四篇

紹興御書石經 淳熙石經閣

十三年二月內出御書左氏春秋及史記列傳宣示館  
職少監秦熈以下作詩以進六月內出御書周易九月  
四日上諭輔臣曰學寫字不如便寫經書不惟可以學  
字又得經書不忘既而尚書委知臨安府張澄刊石頒  
諸州學十四年正月出御書尚書十月出御書毛詩十

六年五月又出御書春秋左傳皆就本省宣示館職作詩以進上又書論語孟子皆刊石立于太學首善閣及大成殿後三禮堂之廊廡 繫年錄十三年十一月丁卯秦檜奏前日蒙付出御書尚書來日欲宣示從臣時上寫六經論孟皆畢因請刊石國學仍盼墨本賜諸路州學詔可 淳熙四年二月十九日詔知臨安府趙磻老於太學建閣奉安石經寘碑石于閣下墨本于閣上以光堯石經之閣為名朕當親寫參政茂良等言自昔

帝王未有親書經傳至數千萬言者不惟宸章奎畫炤  
耀萬世崇儒重道至矣上曰太上字畫天縱冠絕古今  
五月二十四日礮老奏閣將就緒其石經易詩書春秋  
左氏傳論語孟子外尚有御書禮記中庸大學學記儒  
行經解五篇不在太學石經之數今摭訪舊本重  
行摹勒以補禮經之闕從之六月十三日御書光  
堯御書石經之閣牌賜國子監百官未請  
觀視從之若稽  
古高宗皇帝實天生德既以聰明聖武戡滌多難

垂中興億年之基洎保大定功投戈息馬於世紛萬殊  
泊乎無一嗜玩唯翰墨相域天縱神與不舍食息書凡  
幾帙帙凡幾字一一肆筆而成翥鳳翔鸞震蕩輝赫端

正嚴重肅如神明

洪邁御  
書閣記


紹興校御府書籍

二年四月乙亥初命館職校御府書籍先是秘書少監  
王昴言本省御府書籍四百九十二種今又有曾叅家  
藏書二千六百七十八卷欲分定四庫分官日校二十



一板從之會要四月十四日 百兩之篇 七分之術 夏五

闕文 玉藻脫簡



玉海卷四十三